


# Prehistoria

A **Prehistoria** (d'o latín *præ*, antis de, y o griego ἱστορία, *historia*) ye un periodo historico, definito como o periodo entre l'aparición d'a Humanidat y l'aparición d'a escritura, quan se dentraría en a Historia. Sindembargo, ista definición ye asobén obchecto de descusions por a sciencia que en fa o suyo estudeyo, a Prehistoria, clamata igual que l'obchecto d'estudeyo.

L'orichen d'o termin ye quan Paul Tournal inventó a parola *Pré-historique* ta referir-se a troballas arqueolochicas que heba feito en espelungas en a rechión d'Occitania. Esdevenió una parola popular en francés arredol d'os anyos 1830 ta fer referencia a o periodo historico d'antis d'a escritura, y apareix en anglés, emplegato por Daniel Wilson, en 1851, ta escampar-se dimpués por atras luengas.



O dolmen de Santilena, en Biescas (Alto Galligo, Uesca, Aragón).



Escultura d'un caballo en una piedra en o chacimiento arqueolochico de Mas d'Azil (Occitania).

## Contenius

### Problematica d'a suya definición

Os alazetz d'a Prehistoria

O final d'a Prehistoria

### Periodos d'a Prehistoria

### Se veiga tamién

### Vinclos externos

## Problematica d'a suya definición

A definición clasica d'a Prehistoria tien problemas, no nomás con os criterios ta fixar a calendata d'o suyo prencipio y a suya fin, sino tamién ta marcar as mugas internas d'os suyos periodos.

### Os alazetz d'a Prehistoria

Seguntes a definición clasica d'a Prehistoria, ista prencipia con l'aparición de l'hombre. Sindembargo, no bi ha una calendata concreta ta marcar a suya aparición, o que ye consecuencia d'una panda evolución de l'hombre ta plegar en o chenero *homo* dende un indeterminato miembro d'a familia d'os *hominidae*. As calendatas son variables seguntes cada investigador, en función d'os criterios emplegatos, de carácter antropolochico u mesmo filosofico.



Stonehenge, en Anglaterra, d'o periodo Neolitico, fa 4.500-4.000 anyadas.

## O final d'a Prehistoria

Tradicionament o final d'a Prehistoria esdevenió con l'aparición d'a escritura, pero dende un punt de vista cronolochico no esdevinió a o mesmo tiempo en todas as rechions. En Echipto ye aceptau a suya fin en l'anyo 3200 aC d'alto u baixo mientras que a Nova Guinea no esdevendría o suyo fin dica l'anyo 1900, por o que os suyos limites no son gaire claros.

Antiparti bi ha qui esfensa una atra definición, con criterios economicos y sociales en cuentas de cronolochicos por o que a fin d'a prehistoria esdevendria quan a societat prencipia a fer una estructuración jerarquizada, modificacions d'habitats, aglomeración urbana y estructuras administrativas entre d'atros cambios. Seguntes istos no tién garra lochica estudiar os incas y mexicas en America, o Imperio de Ghana o Gran Zimbabue en Africa u o Imperio Khmer en Asia aintro a prehistoria nomás por a ausencia de textos escritos quan os suyos repuis contrimuestran un gran desembolique d'a suya societat.

## Periodos d'a Prehistoria

A prehistoria ye un periodo muit extenso, y bi ha controversias con a suya destribución en periodos, a divisiòn mas aceptada tradicionalment la divide en tres edats:

1. Edat de piedra, subdividida en dos periodos:
  1. Paleolitico.
  2. Neolitico.
2. Edat de bronze.
3. Edat de fierro.

Tamién ye frequent ista atra divisiòn:

1. Edat de piedra, subdividida en dos periodos:
  1. Paleolitico.
  2. Neolitico.
2. Edat d'os metalls, subdividida en dos periodos:
  1. Calcolitico u edat de l'Arambre.
  2. Edat de bronze.
  3. Edat de fierro.

## Se veiga tamién

- Arqueolochía.
- Evolución de l'hombre.
- Historia.
- Paleoantropolochía.




*Lucy*, un fósil muit completo d'un *Australopithecus afarensis* descubiertu en Etiopia en 1974.

- Prehistoria (sciencia).

## Vinclos externos

---

-  Se veigan as imáchens de Commons sobre **a Prehistoria**.
  - **(ca)** Departamento de prehistoria d'a Universitat Autònoma de Barcelona. (<http://www.uab.es/servlet/Satellite/departament-de-prehistoria-1251787583178.html>)
  - **(es)** Revista *Trabajos de prehistoria* d'o CSIC. (<http://tp.revistas.csic.es/index.php/tp>)
- 

Obtenito de "<https://an.wikipedia.org/w/index.php?title=Prehistoria&oldid=1600951>"

---

**Zaguera edición d'ista pachina o 16 avi 2017 a las 00:01.**

O texto ye disponible baixo a Licencia Creative Commons Atribución/Compartir-Igual; talment sigan d'aplicación clausulas adicionales. Mire-se os terminos d'uso ta conoixer más detalles.